

Svilup positiv cumbinaus cun entgins fastedis

Il campinadi da ballapei regional ei a fin per quest atun, era pils juniors. La Surselva ei separticipada cun diesch squadras a quel, l'emprema ga cun ina da mattatschas. La bilanza ch'il cau dalla cuminonza d'interess dils clubs dalla Surselva, Daniel Carigiet fa, ei per gronda part positiva. In dils problems da pliras equipas ei la munconza da golis.

HANS HUONDER/FMR

Dapi entgins onns coopereschan ils clubs da ballapei dalla Surselva en ina cuminonza da juniors. Quella soluziun ei stada necessaria damai che bein enqual club haveva difficultads da recrutar avunda giugadurs per las squadras dallas differentas categorias da vegliadetgna. Quest atun ei la cuminonza ida cun diesch equipas el campinadi: ina da juniors A, duas da juniors B, treis da juniors C e treis da juniors D. Leutier ei vegnida per l'emprema ga insumma ina squadra da junioras ella categoria sut 15 onns. Grazia al grond diember d'equipas dils mattatschs eis ei stau pusseivel da porscher ils trenaments en plirs loghens ed aschia d'impeidir memia liungs viadis a quels. Tut en tut ein rodund 180 junioras e juniors stai engaschai en ina squadra ni l'altra.

Buna partenza dallas mattatschas

Per la sorpresa ord vesta dallas squadras da junioras e juniors dalla Surselva han las mattatschas procurau quest atun. Dils ogt giugs da campinadi han ellas gudignau tschun, contonschiu dus remis e spiors sulet ina scuntrada. Cun 17 puncts schai l'equipa trenada dad *Esther Vonplon* communablamein cun *Vitus Gartmann* e *Laura Casanova* per la fin dalla runda d'atun sigl excellent tierz plaz dalla tabella. «Nus essan fetg cuntents cun quella prestaziun, tonpli che nus savevan buca tgei che spetgi sin nus», di *Daniel Carigiet*, cau dalla cuminonza d'interess dallas

equipas da juniors dils clubs da ballapei dalla Surselva. Igl ei numnadamein stau l'emprema ga ch'ina squadra dalla Surselva ei separticipada al campinadi official dallas junioras. Damai che l'equipa consista da biaras mattatschas dall'annada giuvna, san ellas aunc dar entgins onns communablamein en quella categoria. «Nus lein secapescha nezegiar uss quei slontsch ed animar ulteriuras mattatschas da dar ballapei», puntuescha Daniel Carigiet.

Engaschi buca remunerau

Cuort suenter las davosas scuntradas dils juniors quest atun ein ils responsabels e trenaders dallas equipas da juniors s'entupai, analisond il decuors dil campinadi d'atun. Medemamein ein ils emprems pass per las preparativas per la primavera vegni discutai. «Mirau sur tut ora essan nus cuntents cul campinadi d'atun. La gronda part dils giugadurs ha giu

gronda disciplina era els trenaments», di Daniel Carigiet. In dils problems specifics ei la munconza da golis: «En quei grau stuein nus far pli gronds sforzs. Sche nus reaghein ussa buca tiels juniors, han las equipas activas enzacu medemamein quei problem.» Buca cumpleinamein cuntents eis el cuagl interess d'ina part dils geniturs: «En sesez fuss ei l'obligaziun da lezs da serender cun lur affons als giugs e buca caussa dils trenaders. Quei unfisescha empau.» La cuminonza, respectivamein ils clubs hagian buca las resursas d'organisar e finanziair quels viadis. In ulteriur problem ein ils viadis dallas junioras

e dils juniors culs mieds da traffic publics als trenaments: «Sin fundament dils uraris dil tren arriva enqualin memia tard ni sto bandunar il trenament pli baul. Quei ei denton buca sempel da sliagar.»

Buca mitschai dalla relegaziun

Las equipas dils juniors A e B ch'ei separticipadas igl atun al campinadi dalla Youth League – la pli alta ligia da juniors dalla Svizzera Orientala – ein vegnidas relegadas. «Ils juniors A havein nus quintaiva ch'els sappien tener petg allas autras equipas e nus havein spitgau dapli da quell'equipa», di Daniel Carigiet. Enqual giugadur – surtut dall'annada pli veglia da quella categoria – hagi buca mussau la prestaziun giavischada. Medemamein ei il cader staus relativamein pigns. Dils 11 giugs ha l'equipa gudignau treis e spiors ogt. La fin finala han treis puncts muncau per restar

en quella ligia. Empau altra ei la situaziun tiels juniors B stada, medemamein ella Youth League: «Nus savevan ch'ei vegni ad esser grev quest atun, damai che nus havein en quella squadra paucs giugadurs dall'annada veglia da quella categoria. Ils giuvens ein aunc buca aschi lunsch cun lur experientscha.» Dils 11 giugs ha il team dalla Surselva gudignau in e sto aschia bandunar quella ligia ensem cun Uznach e Rorschach-Goldach. Ellas ulteriuras categorias han las equipas sursilvanas mussau prestaziuns fetg differentas. L'emprema equipa dils juniors C terminescha il campinadi ella categoria promoziun el miez dalla tabella. L'emprema equipa dils juniors D ha spiors tuts diesch giugs ella categoria elita.

Il plascher ei decisiv

«Naturalmeins ch'ils resultats ein impurtants per la morala, mo decisiva ei la scolaziun che nus savein porscher e la bunaveglia ed il plascher da trenar dil singul giugadur. Pli bugen dar il campinadi en ina ligia pli bassa che da star en ina pli alta e semudergiar l'entira stagiun», di Daniel Carigiet. Las proximas jamnas san ils juniors aunc trenar per part voluntariamein en halla, lu suonda la pausa d'unviern. In dils problems che fatschenta ils clubs da ballapei dalla Surselva il mument ei la munconza d'arbiters. Tenor Daniel Carigiet eis ei previu da far ina campagna il proxim temps per animar in ni l'auter da sedecider per quell'incarica. Legreivels ei vinavon il sustegn da sponsurs. Las equipas da juniors dalla Surselva han survegniu igl atun treis munduras novas.

Emprem gol da Fabrizio Cavegn per l'emprema equipa da S. Gagl

El giug digl otagavel final dil Cup svizzer il mardis sera encunter Arbedo-Castione ha *Fabrizio Cavegn* sittau siu emprem gol per l'emprema equipa da S. Gagl en in giug da concorrenza. Ella 88avla minuta ei reussiu ad el il 5:0 per sia squadra. Quei ei lu era gest stau il davos gol en quella partida. Fabrizio Cavegn era vegnius el giug ella 65avla minuta per *Chadrac Akolo*. Il giuven Lumnezian ei engaschus tiel Club da ballapei S. Gagl dapi biebin in onn. L'entschatta ha el sittau gols per la secund'equipa dil club, las davosas jamnas eis el staus el cader dall'emprema e ha saviu rimnar empremas experientschas ella Super League. (fmr/hh)

